



mjesečni Bilten

omladinska mreža bosne i hercegovine

februar
veljača
2020.

249

Dragi prijatelji/ce,

Predstavljamo vam **februarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u februaru	2
Aktivnosti članova mreže	6
Saopštenja/informacije/donatori/pozivi	13

Uživajte u čitanju!

AKTIVNOSTI ORC/HCA U FEBRUARU 2020.

Prepoznaj i prati online prijetnje u društvenim medijima

Događaj kojim se obilježio početak implementacije projekta "Jačanje civilnog društva u Bosni i Hercegovini da prepozna i prati online prijetnje na društvenim medijima" kojeg finansira Evropska unija, održao se 24. i 25. februara u Hotelu Ibis Styles u Sarajevu.



Projekat je okupio mlade iz cijele Bosne i Hercegovine, njihove mentore, koordinate i monitore, kako bi identifikovali trendove govora mržnje i radikalizacije koji vode ka nasilnom ekstremizmu i naučili prepoznavati forme u kojima se pojavljuje ovakva komunikacija u društvenim medijima. U tu

svrhu biće formirana i web platforma na kojoj će se razmenjivati informacije i ponuditi sadržaji koji ovu problematiku približavaju mladima, civilnom društvu, medijima i institucijama. Na događaju su predstavljena i tekuća izrada studije o uticaju pomenutih trendova na mlade, posebno na ranjive kategorije ovog dijela populacije. Jedan od partnera projekta jeste upravo i Omladinski resursni centar Tuzla, ispred kojeg su kao učesnici bili: Slobodan Blagovčanin (mentor), Mirela Biković, Emir Karamujić, Elda Lolić, Lejla Galušić, Džejlja Krdžalić, Amir Havić i Eman-Hanan Pinjić.

II redovna skupština Vijeća mladih Grada Tuzla

II redovna Skupština Vijeća mladih Grada Tuzla je održana 26.2.2020. godine u JU "Centar za kulturu". Bila je ovo izvještajno izborna sjednica.

Izabrali smo novo rukovodstvo tako da će u naredne dvije godine predsjednica Skupštine biti Selma Omerović iz UG "Multi".

Novi predsjednik Vijeća mladih Grada Tuzla je Adi Selman iz KBS "Tuzla", a potpredsjednica Asja Dizdarević iz organizacije "Osmijeh za Osmijeh".


Pored izbora predsjednika i potpredsjednice, na Skupštini je izabrano i rukovodstvo Upravnog odbora VMGT. Član Upravnog odbora Vijeća mladih Grada Tuzla u naredne dvije godine bit će i Emir Karamujić iz našeg Omladinskog resursnog centra!

Ostali članovi i članice Upravnog odbora VMGT će biti: Amar Kavgić iz UG "Multi", Dina Bajrektarević iz Tuzlanskog otvorenog centra, Anamarija Divković iz OP "Revolt" i Emira Hamzić iz Udruženja "Pozorište mladih Tuzle".



Pored novog rukovodstva, delegati/kinje na sjednici su usvojili izmjene i dopune Statuta, novi Pravilnik o radu Skupštine, izvještaj o radu organizacije i plan rada UO u tekućoj godini. Pratite nas jer motivisani smo da u 2020 godini radimo još više za mlade Grada Tuzla!

Sastanak partnera - Peace innovation lab, Črnomelj, Slovenija



U periodu od 17. do 20. februara u Črnomelju, Slovenija, započeo je partnerski projekat pod nazivom "Peace innovation lab: Youth work in edition". Tokom 3 dana, partneri okupljeni oko mreže organizacija "SEEYN" su detaljno planirali aktivnosti koje nas očekuju tokom implementacije projekta. Cilj projekta je da koristeći metodologiju društvenih inovacija u radu sa mladima iz država učesnica projekta

kreiramo aktivnosti, prilike i edukacije za kontinuiran rad na izgradnji mira. Finansijsku podršku za projekat je osigurala Evropska Unija.

Omladinska grupa ORC Tuzla

Perspektiva u Tuzli!

Mladi ljudi iz Tuzle bili su naši učesnici u drugoj emisiji šeste sezone perspektive, a u posljednjoj epizodi sa mladima razgovarao Zlatan Begić, profesor na Univerzitetu u Tuzli i zastupnik u Parlamentarnoj Skupštini Bosne i Hercegovine. Razgovor je moderirao Marčelo. Ispred ORC-a Tuzla na snimanju su bili Mirela Biković i Duško Majkić.



KORA 7

Mreža M.O.C.A.R.T. Republike Srpske i Sekretarijat Mreže omladinskih centara za animiranje, razvoj i trening Republike Srpske „Perpetuum mobile – Institut za razvoj mladih i zajednice” Banja Luka, uz podršku Ministarstva porodice, omladine i sporta u Vladi Republike Srpske. Organizatori su Sedme konferencije omladinskog rada Republike Srpske

Oko 80 učesnika iz Srbije, Bosne i Hercegovine, Belgije i Francuske uzeli su učešće na Konferenciji i dali svoj doprinos dijeleći sa nama svoje lične priče i iskustva. Tema ovogodišnje „KORA 7” bila je prilika za mlade i prenošenje pozitivnih primjera iz prakse omladinskog rada iz regiona i Evropske Unije.

Osim toga, Mreža M.O.C.A.R.T. Republike Srpske ugostila je predstavnika Međunarodne kancelarije za mlade pri Nacionalnoj agenciji Belgije za francusko govorno područje, koja je u sastavu Federalnog ministarstva Valonija – Brisel, gospodina Thierry-a Doufour.



Pažljivo osmišljen program, panel sa donatorima, inspirativni govori mladih u okviru T.A.L.K.S. platforme slobode govora, samo su dio aktivnosti koji su predstavljeni tokom trodnevne konferencije. Osim toga, predstavljeni su prijedlozi saradnje omladinskih centara na regionalnom, državnom i lokalnom nivou.

Kao jedan od niza rezultata i zaključaka Sedme Konferencije omladinskog rada utvrđen je i program studijske posjete delegacije koja će predstavljati omladinski sektor Republike Srpske, te uspostaviti saradnju sa omladinskim sektorom u Briselu.

Predstavnik ORC Tuzla na Sedmoj konferenciji omladinskog rada Republike Srpske je bio Emir Karamujić.

#NeLaj – Boris Divković Fondacija



Fondacija Boris Divković organizuje edukativne treninge namijenjene mladim predstavnicima različitih političkih stranaka koji dolaze iz cijele BiH. #NeLaj će ove godine trenirati u tri grada: Sarajevo, Banja Luka, Mostar!

Trening za mlade političare iz Banja Luke je održan od 21. do 23. februara. Drugi dan edukativnog treninga je započeo sa predavanjem Emira Karamujića, predstavnika ORC Tuzla. Tema predavanja je bila “Kako se boriti protiv govora mržnje na digitalnim platformama”, sa primjerima CAT

kampanje i praktičnom radionicom za mlade političare iz Banja Luke.

Poslije serije treninga će uslijediti follow up aktivnosti, u vidu organizovanja Galerije uvreda i govora mržnje širom gradova BiH.

Cilj projekta je naučiti sudionike o posljedicama negativnog korištenja online platformi i podići svijest o nasilnom ekstremizmu, govoru mržnje i cyber bulling. Glavno pitanje na koje želimo odgovoriti je: Gdje je linija između govora mržnje i slobode govora?

Projekat finansira USAID Bosnia and Hercegovina, a njegovu provedbu podržava IOM Bosnia and Hercegovina u okviru programa BHRI. #NeLaj projekat implementira Fondacija Boris Divković.

RYCO konsultacijski sastanak



Kroz projekat podržan od strane Europske unije, RYCO želi povećati mogućnosti mladih da se uključe u aktivnosti koje grade međusobno razumijevanje i pomirenje u građanskim, socijalnim, obrazovnim, kulturnim i sportskim oblastima s Zapadnog Balkana.

S tim u vezi, **RYCO organizuje niz lokalnih konsultacijskih sastanaka**, gdje su mladi ljudi imali priliku da izraze svoje mišljenje o radu RYCO-a i o tome kako žele da izgledaju budući Otvoreni pozivi. Jedan od takvih

sastanaka održan je u Brčkom, a ispred ORC Tuzla učešće je uzela Mirela Biković.

Regionalna kancelarija za saradnju mladih - RYCO vjeruje da bi mladi ljudi trebali imati izraženu ulogu kada se razgovora o programima koji su direktno vezani za njih. Zbog toga žele čuti njihovo mišljenje u vezi tipova projekata i pristupa interkulturalnom učenju koje bi željeli vidjeti u budućim Otvorenim pozivima za projektne prijedloge.

REDOVNE AKTIVNOSTI ORC I HCA TUZLA

Tokom februara radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice



Omladinska organizacija Svitac je nastavila sa svakodnevnom aktivnostima po redovnom rasporedu, prva grupa učesnika od 11:00-13:00 uzrasta od 4-7 godina, a druga grupa učesnika od 14:00-15:30 uzrasta 8+. Mlađi učesnici su kreirali edukativne stvari uz pomoć lokalnih i međunarodnih volontera. Grupa najmlađih učesnika je imala priliku napraviti razne dekoracije: avione od papira, voziće od toalet rolnica, semafore, zvečke i bojiti životinje. Kao i prošlog mjeseca, vježbali smo pozdrave i riječi na engleskom jeziku na temu

prijateljstvo i tolerancija. Učesnici su takođe nastavili vježbati abecedu - slova Ć, D, Đ i Dž te su učili slova F, G, H i riječi koje počinju tim slovima. Na muzičkim radionicama su učili novu pjesmicu „Ivin voz“ i u okviru te radionice pravili male zvečke. U okviru redovnih aktivnosti, takođe smo imali slušanje priča: „Priča o gusjenici“, „Daleko životinjsko carstvo“ i priču o važnosti pčela „Mali bumbar Hildi“. Nakon priče o životinjskom carstvu su pogledali kratku lutkarsku predstavu kroz koju su imali priliku još jednom vidjeti radnju priče. Ovaj mjesec smo takođe posvetili pažnju higijeni i piramidi zdrave ishrane, gdje smo metodama prilagođenim uzrastu ukazali na važnost održavanja higijene i zdrave ishrane. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom je kreativno izražavanje, utorkom su učesnici vježbali engleski i njemački jezik, srijedom su crtali i čitali stripove, četvrtkom su se družili uz sportske aktivnosti, društvene i teambuilding igre, a petkom su nastavili raditi na slobodnim temama kreativnog izražavanja. Ovaj mjesec smo takođe održali interaktivnu radionicu za uzrast 12+ na temu „Vršnjačko nasilje“, te kroz razmjenu iskustava



ukazali na ovaj gorući problem u BiH. Sa učesnicima smo razgovarali na temu verbalnog i fizičkog nasilja u školi, ali i u neposrednom životnom okruženju, svakodnevnim problemima i nenasilnim metodama u rješavanju verbalnog i fizičkog zlostavljanja. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugom i usvoje lijepo ponašanje. Koordinator radionica je bio Adin Midžić uz asistenciju lokalnih, Weltwärts i EVS/ESC međunarodnih volontera. Sve aktivnosti se održavaju u Omladinskom centru Brčko distrikta.

Radionice gitare

Učesnici radionice gitare su nastavili rad na etidama, tehnikama, kompozicijama, skalama, harmonizaciji i improvizaciji iz prethodnog perioda.

Radionice sambe

Učesnici ove radionice su počeli raditi na tri nove ideje („Byte Bato“, „Ken Ripit“ i „Naftno kolo“). Sve tri kompozicije su bez električnih instrumenata (Bas i električna gitara), sa tri različita tempa. Prva, nešto sporijeg tempa, naslanja se na funky ritam, druga za ritmičku osnovu ima sambu, a treća drum and bass.

ECO Projekat

Članovi ekološkog projekta su nastavili sa planiranjem budućih aktivnosti za 2020. godinu. Naš tim je počeo sa planiranjem uzgoja biljaka i povrća za vrt pored rijeke Save u okviru projekta „Gradske bašte“. Veoma nam je drago što možemo podržati naš grad i kreativne mlade ljude, koji su došli na ovu ideju. Sađenje drveća je planirano za mart kada ćemo imati sigurno mjesto i lijepo vrijeme na našoj strani. Početkom februara je urađena još jedna ulična akcija u svrhu prikupljanja novčanih sredstava za kupovinu sadnica i radni plan za ekološke prezentacije po osnovnim i srednjim školama.

Dan socijalne pravde

Omladinska organizacija Svitač je 20.02. organizovala radionicu na temu obilježavanja međunarodnog dana Socijalne Pravde. Radionici je prisustvovalo 13 učesnika uzrasta 4-6 godina; radna metoda i način rada je prilagođen njihovom uzrastu. Imali su priliku slušati priču usko vezanu za temu, a nakon toga su diskutovali o pozitivnim primjerima iz priče. Radionica je održana u prostorijama Omladinskog centra Brčko distrikt.



Dan maternjeg jezika

UNESCO je 21. februar 1999 godine proglasio Danom maternjeg jezika. Svitač je ovaj datum obilježio sa dvije aktivnosti. Učesnici uzrasta 4-6 godina su učili kako reći ljubav na španskom, njemačkom,

engleskom, turskom i mađarskom jeziku, te su nakon diskusije prilagođene njihovom uzrastu o raznim jezicima u svijetu bojili radni list.

Učesnici uzrasta 15+ su takođe razgovarali o važnosti očuvanja raznih jezika u svijetu, te su učili kako na više jezika reći zdravo. Takođe su imali priliku pogledati video o važnosti i njegovanju jezika, te nakon toga raditi u malim grupama i napisati pro-i kontra argumente na pitanje da li bi bilo bolje da svi ljudi u svijetu govore samo jedan jezik.

Radionice su održane u prostorijama Omladinskog centra.

“Narandžasti dan” (Orange day)

Omladinska organizacija Svitac je 25.02. bila dio događaja pod nazivom „Narandžasti dan“. Narandžasti dan je proglašen od strane Ujedinjenih naroda i održava se svakog 25-og u mjesecu. Cilj ovog događaja je podizanje svijesti i poduzimanje mjera za eliminaciju nasilja nad ženama i djevojčicama. Radionicu je vodio dnevni koordinator Adin Midžić, u sklopu „UMiD“ treninga za mlade lidere. Trening organizuje "Institut za razvoj mladih KULT", a podržava Ambasada Kraljevine Švedske u BiH. Narandžasti dan se odvijao istovremeno u 13 lokalnih zajednica u Bosni i Hercegovini. Svitac je održao dvije radionice. Prva radionica održana je za dobnu skupinu od 4 do 6 godina. Cilj radionice je bio da dječak i djevojčica u paru zajedno ispunjavaju zadatke i pri tome pomažu jedno drugom. Na kreativnom dijelu radionice zadatak je bio nacrtati poklon za svog drugara. Na radionici su sudjelovala 23 učesnika i održala se od 11 do 13 sati u prostorijama Omladinskog centra Brčko distrikta.



Na drugoj radionici sudjelovalo je 10 učesnika uzrasta 15 godina. Na početku radionice pogledali su kratki dokumentarni video o nasilju nad ženama i djevojkama u Bosni i Hercegovini. Nakon toga u grupi su razgovarali o vrstama nasilja, kako prepoznati nasilje u svojoj zajednici i koji su koraci preduzeti kako bi se to spriječilo. Na kraju su informisani o svim sigurnim kućama u Bosni i Hercegovini i SOS telefonskim brojevima za sprečavanje nasilja. Radionica je održana od 13 do 14 časova, u prostorijama Omladinskog centra Brčko distrikta.

Za mart se planira nastavak svih redovnih radionica Omladinske organizacije Svitac.

Institut za
razvoj mladih KULT



Ul. 4. Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org, web:

www.mladi.org

Polaznice i polaznici obuke UmiD ukazali na problem nasilja nad ženama i djevojčicama u BiH

Institut za razvoj mladih KULT već godinama ukazuje na problem nasilja nad ženama i djevojčicama i svakog 25. u mjesecu obilježava Narandžasti dan, dan borbe protiv nasilja nad ženama i djevojčicama. Institut na različite načine upoznaje javnost na prisutnost problema, educira mlade o načinima prevencije nasilja, te zagovara najbolja rješenja za zaustavljanje ili smanjenje nasilja nad ženama i djevojčicama.



Prema dostupnim podacima svaka druga žena u BiH je nakon 15. godine bila žrtva nasilja, što predstavlja ogroman problem i kršenje zagarantovanih ljudskih prava. Zbog toga su danas polaznice i polaznici Institutove obuke UMiD, generacija 15, u 13 lokalnih zajednica obilježili Narandžasti dan i pozvali cjelokupnu javnost da se aktivnije uključi u rješavanje ili sprječavanje ovog problema.

U Ilijašu su mladi na glavnom šetalištu postavili transparent s natpisom Stop nasilju, pozvali sugrađane/ke da se informiraju o važnosti borbe protiv nasilja i da im se pridruže u njihovom djelovanju. Đenana Šehić bila je jedna od organizatorki aktivnosti u Ilijašu, izjavila je da je zadovoljna odzivom građana i aktivnostima volontera. Đenana kaže da je svaki vid nasilja nedopustiv i da stalno moramo pričati o tome. Napominje da žrtve često imaju strah i ne smiju govoriti o problemu zbog čega je neophodno da se kao društvo uključimo u rješavanje ovog problema.

Nešto istočnije od Ilijaša, u Foči, Marija Mališ učenica JU Srednjoškolski centar u Foči, također polaznica obuke UMiD 15, danas je pred 40 vršnjaka održala edukativni čas na temu prevencije nasilja nad ženama i djevojčicama.

Pored Ilijaša i Foče, Narandžasti dan se obilježava i u Brčkom, Srebreniku, Kiseljaku, Tuzli, Banjoj Luci, Novom Travniku, Bihaću, Žepču, Zenici, Maglaju i Ilidži.

Mladi iz 15 zajednica spremniji na kritičko promišljanje

Više od 30 mladih iz 15 lokalnih zajednica iz BiH spremniji će dočekati lokalne izbore, jer su osposobljeni za kritičko promišljanje i analizu političkih poruka. Mladi su primijetili značajnu upotrebu negativne retorike u političkom govoru i kakav utjecaj tako plasirane informacije imaju na mlade, ali i ostatak stanovništva u BiH.

Institut je u periodu od 1. decembra 2019. g. do 15. januara 2020. godne uradio istraživanje o negativnom govoru i retorici podjele kod političara u medijima, a rezultati su pokazali da su identificirani političari/ke u najčitanim štampanim i elektronskim medijima u 45 dana dali više od 600 izjava. U navedenim izjavama, mladi su spomenuti samo 11 puta i to isključivo u kontekstu odlaska iz BiH, a približno 30% izjava općenito su negativnog tona. Na osnovi istraživanja i ranijih iskustava Instituta razvijena je kratkoročna obuka za mlade, čiji cilj jeste da osposobi mlade da kritički promišljaju o izjavama političara u javnosti, te da shvate utjecaj negativne retorike na procese izgradnje mira u BiH. Obuke su organizirane u Mostaru i Banjoj Luci, na kojima je priliku za učešćem imalo više od 30 mladih.



Tokom obuka mladi su kreirali kratke video spotove u kojima su političarima poručili čime bi se trebali baviti i na čemu bi trebao biti fokus njihove priče uoči lokalnih izbora. Također, po završetku obuke najbolje ideje mladih dobit će finansijsku i mentorsku podršku kako bi u svojim zajednicama provodili aktivnosti koje doprinose povećanju svijesti o važnosti kritičkog promišljanja i utjecaja negativne retorike na živote ljude u zajednicama.

Aktivnosti su provedene u okviru projekta “Podrška mladima u lokalnim zajednicama u Bosni i Hercegovini” koji provodi Međunarodna organizacija za migracije (IOM), uz finansijsku podršku Vlade Ujedinjenog Kraljevstva

Počeo UMiDp 3: Mladi političari i političarke spremni za aktivnije učešće

Institut za razvoj mladih KULT svečano je upisao i treću generaciju polaznika/ca obuke za omladinske političare i političarke. Obuku će u narednom periodu pohađati 23 mlada političara i političarke iz 11 različitih političkih stranaka i iz svih dijelova Bosne i Hercegovine s ciljem da u budućnosti pitanja mladih pozicioniraju na listu prioriteta aktuelne politike u Bosni i Hercegovini.

Adnan Avdić iz Naše stranke jedan je od polaznika obuke, koji je istakao da ima velika očekivanja i da vjeruje da će biti ispunjena jer je na samom početku uvidio visok nivo profesionalizma i predanosti organizatora i predavača.

Sličnog je razmišljanja i mlada Tonina Ibrulj iz Ljubuškog, članica Hrvatske demokratske zajednice. Ona smatra da je obrazovanje ključno u razvoju vještina kod mladih, kako formalno, tako i neformalno, što je jedan od razloga zbog čega se odlučila i za ovu obuku.



UMiDp je Institutov program za omladinske političke lidere/ice, mlade koji dolaze iz različitih političkih stranaka i kroz tri petodnevna modula obuke usvajaju znanja i vještine o poznavanju političkog sistema u BiH i djelovanja u njemu, o razvoju političkog imidža te o političkom zagovaranju i pregovaranju za rješavanje problema i

potreba mladih.

Ekrem Sarajlić iz Viteza odnedavno je predsjednik općinske organizacije SDP u Vitezu i ističe da je spreman za ovu odgovornu funkciju, a uvjeren je da će mu obuka UMiDp pomoći u tome. Njegov kolega s obuke, Miloš Kovačević iz Laktaša član je Demokratskog saveza DEMOS, jedne od mlađih stranaka na bh. političkom nebu, ali kako ističe Kovačević sa iskusnim pojedincima i novom energijom koju su unijeli mladi. Iako se ne namjerava kandidovati na lokalnim izborima, spreman je svoje teoretsko znanje prenijeti u praksu i pomoći u ostvarivanju što boljih izbornih rezultata.

Institut ovom obukom želi staviti mlade u fokus i osnažiti ih za aktivno učešće unutar vlastitih političkih stranaka, ali i tokom i nakon izbornih procesa, kako bi mogli stručno zastupati potrebe mladih. Prvi modul obuke održao se u Sarajevu, od 19. do 23. februara. Naredni modul održat će se u Mostaru tokom aprila, a posljednji, treći modul, u Banjaluci tokom maja 2020. godine.

Obuka se provodi uz podršku Ambasade Kraljevine Švedske u BiH.



Udruženje za društvena istraživanja i komunikacije - UDIK

Ul. Grbavička 51, 71000 Sarajevo

Tel./fax: +387 33 978 600; +387 33 978 605

E-mail: official.udik@outlook.com; official.udik.brcko@outlook.com

Web: www.udik.org; www.udik-brcko.org

Memorijalizacija kao oblik (ne)pomirenja u zajednici



U periodu od 8-9. februara Udruženje za društvena istraživanja i komunikacije (UDIK) je organizovalo predavanje pod nazivom „Memorijalizacija kao oblik (ne)pomirenja u zajednici“. Predavanje je održano u Banjoj Luci, a učesnici su bili predstavnici nevladinog sektora, predstavnici lokalnih vlasti, udruženja porodica žrtava i mladi aktivisti. Kroz predavanje, zajednički dijalog i razmjenu iskustava nastojalo se odgovoriti na brojna pitanja: Kakva je spomenička kultura u BiH i regionu? Da li građanska memorijalizacija doprinosi pomirenju u zajednici? Zašto BiH nema zakon o izgradnji spomenika? Da li postoje kontroverzni spomenici u zajednici i kakvi su?

Obilježavanje godišnjica stradanja

U mjesecu februaru aktivisti Udruženja za društvena istraživanja i komunikacije (UDIK) su prisustvovali komemoracijama u povodu godišnjice stradanja sarajevskih civila na Markalama (5.2) i godišnjice otmice civila u Štrpcima (27.2). Objavom saopštenja za javnost i polaganjem vijenaca na mjestima sjećanja, UDIK je nastojao podsjetiti javnost na ove godišnjice. Posjeta mjestima stradanja i obilježavanje godišnjica je dio redovnih UDIK-ovih aktivnosti tokom godine.



INFORMACIJE / DONATORI / POZIVI

Javni poziv



Misija „RUSAG“ udruženja podrazumijeva zaštitu i unapređenje kulture i kulturnih obilježja, razvoja i očuvanja starih zanata i vještina srednjovjekovne Bosne. U skladu sa tim UG „RUSAG“ objavljuje javni poziv i tim povodom pozivamo sve mlade zainteresovane ljude starosne dobi od 15 do 30 godina sa područja Prijedora da se prijave i sudjeluju u kreativnim radionicama izrade srednjovjekovnih odora i obuće i iskuse kako je to bilo u srednjovjekovnoj Bosni. Ovaj projekat se realizuje u Prijedoru pod nazivom „Bosanski vitez ustaje“, koji je finansiran kroz program BHRI, a koje ga implementira UG „RUSAG“, čiji je cilj predstaviti mladim ljudima period vladavine Tvrtka I Kotromanića, bosanskog kralja, naučiti mlade kako da naprave svoj grb i upoznati ih sa načinom izrade i izgledom srednjovjekovne odjeće i obuće vitezova tog doba.



BHRI
BOSNIA AND HERZEGOVINA
RESILIENCE INITIATIVE

Udruženje građana "Rusag" objavljuje u sklopu projekta
„Bosanski vitez ustaje“
JAVNI POZIV

U sklopu projekta „Bosanski vitez ustaje“, koji je finansiran kroz program BHRI, a koji implementira UG „RUSAG“, cilj je predstaviti mladim ljudima period vladavine Tvrtka I Kotromanića, bosanskog kralja, naučiti mlade kako da naprave svoj grb i upoznati ih sa načinom izrade "replika" srednjovjekovne odjeće i obuće vitezova tog doba.

Radionice će se realizovati u periodu mjeseca
marta i aprila,
i mogu se prijaviti svi mladi ljudi od 15-30 godina,
sa područja Prijedora.

Učesnici koji budu odabrani biće obavješteni o detaljnijim terminima i mjestu održavanja radionica.

(prijave poslati najkasnije do 10.03.2020)

Troškove prevoza, osvježenja i radnog materijala snosi organizator.
Zainteresovani se mogu prijaviti putem:
email-a: kvitezovi@gmail.com
FB profila ili Instagram profila



Radionice će se realizovati u periodu mjeseca marta i aprila, i mogu se prijaviti svi mladi ljudi od 15-30 godina, sa područja Prijedora.

Učesnici koji budu odabrani biće obavješteni o detaljnijim terminima i mjestu održavanja radionica.

Troškove prevoza, osvježenja i radnog materijala snosi organizator.

Zainteresovani se mogu prijaviti preuzimanjem i popunjavanjem prijavnice putem:

1. email-a: kvitezovi@gmail.com
2. FB profila
3. Instagram profila ili
4. Linkom na: Prijavnica

Poziv

Za izražavanje interesa za dostavu projektnih prijedloga u svrhu učešća u Programu razvojne saradnje Republike Češke u BiH u partnerstvu sa Fondom za zaštitu okoliša FBIH

Na osnovu člana 4. stav 1. alineja 2. Zakona o Fondu za zaštitu okoliša Federacije Bosne i Hercegovine („Službene novine Federacije BiH“ broj: 33/03), člana 7. stav 1. tačka 2. Statuta Fonda za zaštitu okoliša Federacije Bosne i Hercegovine („Službene novine Federacije BiH“ br: 33/06, 1/15 i 62/15), a u skladu sa tačkom 2. člana 4. Pravilnika Fonda za zaštitu okoliša Federacije Bosne i Hercegovine o međunarodnim projektima po ugovorima/sporazumima sa međunarodnim partnerima br. UO-01-3-8-21-2/2018 od 13.12.2018. godine i Odlukom Upravnog odbora Fonda za zaštitu okoliša Federacije Bosne i Hercegovine o uključivanju Fonda za zaštitu okoliša Federacije Bosne i Hercegovine u Program razvojne saradnje Republike Češke u BiH za period 2020-2022 broj: UO-01-3-3-29-2/2020 od 25.02.2020. godine, Fond za zaštitu okoliša Federacije Bosne i Hercegovine objavljuje:

Poziv za izražavanje interesa za dostavu projektnih prijedloga u svrhu učešća u Programu razvojne saradnje Republike Češke u BiH u partnerstvu sa Fondom za zaštitu okoliša Federacije BiH

Pozivaju sve svi zainteresirani subjekti da iskažu svoj interes za učešće u Programu u roku od 30 dana od dana objavljivanja Poziva.

Sve prijave, u skladu sa „Općim uslovima i informacijama“ navedenim u tekstu Poziva, slati isključivo elektronski na e-mail adresu: info@fzofbih.org.ba

Tekst Poziva za izražavanje interesa i Obrazac za prijavu možete preuzeti na linkovima:

[Poziv-za-izražavanje-interesa-za-dostavu-projektnih-prijedloga-ZA-OBJAVUPreuzmi](#)

[Obrazac-Projekt-ni-sažetak-Koncept-notaPreuzmi](#)

CCI grantovi za borbu protiv korupcije

Centri civilnih inicijativa (CCI) kao implementator projekta Podrške građanima u borbi protiv korupcije koji je finansijski podržan od strane Američke agencije za međunarodni razvoj (USAID) upućuje javni poziv organizacijama civilnog društva (udruženjima i fondacijama) iz Bosne i Hercegovine da podnesu prijedloge projekata usmjerenih na borbu protiv korupcije, s fokusom na rješavanje konkretnih problema identifikovanih na lokalnom nivou ili zagovaračkih inicijativa usmjerenih ka višim nivoima vlasti.

Javni poziv je otvoren kontinuirano odnosno do konačne raspodjele sredstava raspoloživih za grantove. CCI će permanentno vršiti vrednovanje prispjelih prijedloga projekata i dodjeljivati grantove za odobrene inicijative, a informacije od značaja za oblast javnog poziva i odgovori na postavljena pitanja će periodično biti revidirani ili dopunjavani na [web-stranici](#). S tim u vezi, pozivamo sve potencijalne aplikante da se redovno informišu o novostima i dopunama javnog poziva.

Program malih grantova predviđa sljedeće iznose podrške namijenjene organizacijama civilnog društva čiji prijedlozi projekata budu odobreni:

- do 15.000,00 USD vrijednost projekta na nivou lokalne zajednice, u trajanju do 12 mjeseci i
- do 50.000,00 USD je moguća vrijednost projekta namijenjenog za provođenje zagovaračkih aktivnosti i inicijativa usmjerenih ka višim nivoima vlasti, u trajanju do 18 mjeseci.

Od aplikanata se traži da dostave ispunjenu aplikacionu formu, te ostale aplikacijom zahtijevane dokumente i to isključivo putem on-line platforme za apliciranje dostupne na [linku](#).

Dokumentaciju možete preuzeti na slijedećim linkovima:

1. [Javni poziv](#)
2. [Aplikaciona forma](#)
3. [Forma budžeta](#)
4. [Izjava o partnerstvu](#)

Aplicirajte za bespovratna sredstva iz Challenge fonda

Bespovratna sredstva u iznosu od **750.000 EUR** iz Challenge fonda ponovo su na raspolaganju privrednim subjektima sa inovativnim poslovnim idejama, proizvodima ili uslugama iz Bosne i Hercegovine i Švedske. Peti javni poziv za dodjelu grant sredstva raspisan je danas i biće otvoren **do 24. marta 2020. godine do 16.00 sati**.

Za potencijalne korisnike iz kategorije startup-a, koji su registrovani najmanje šest mjeseci, predviđen je maksimalni iznos granta od 10.000 EUR, dok korisnici iz kategorije zrelih privrednih subjekata do 250 zaposlenih, koji obavljaju djelatnost duže od dvije godine, mogu računati na podršku u maksimalnom iznosu do 30.000 EUR. Aplikanti moraju obezbijediti i minimalno vlastito učešće od 50% ukupne vrijednosti predloženog projekta, čija realizacija ne može trajati duže od godinu dana.

Sve pristigle prijave biće ocijenjene u skladu sa tri osnovna kriterija – inovativnost, izvodljivost i održivost poslovne ideje i društvena korist.

Prijave na ovaj poziv moraju biti podnesene isključivo u elektronskoj formi na web sajtu www.c2c.ba u skladu s uputstvima koja se nalaze u dokumentu **Vodič/Smjernice za aplikante**. Ovaj dokument je sastavni dio Aplikacionog paketa kojeg možete preuzeti na [ovom linku](#).

Challenge fond uspostavljen je u okviru projekta Challenge to Change koji finansijski podržava Švedska agencija za međunarodni razvoj i saradnju /Sida/, a provode ga, kroz četiri godine, Sarajevska regionalna razvojna agencija SERDA i Razvojna agencija Republike Srpske (RARS). Partner u projektu je i region Ostergotland, Istočna Švedska.

Ovo je posljednji poziv planiran u okviru projekta. U okviru prethodna 4 poziva za dodjelu bespovratnih sredstava iz Challenge fonda prijavila su se 2.074 aplikanta. Do sada je ugovoreno 110 korisnika, a vrijednost dodijeljenog granta je 2.500.866 EUR. U toku je potpisivanje ugovora sa još 38 korisnika kojima će biti dodijeljeno oko 844.000 EUR bespovratnih sredstava.



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba**

*Mjesečni bilten uređuje
Omladinski resursni centar - ORC
Tuzla*

Urednik Biltena:

Mirela Biković

Prevod Biltena na engleski: **Emir Karamujić**

WEB stranica Mreže:

www.omladina-bih.net

Mejling lista Mreže:

posta@omladina-bih.net

Webmaster:

emir.delalic@gmail.com